

Pa papia tocante trafico humano na St. Francis College na New York

Paula Nahr invita pa Amnesty International USA



ORANJESTAD (AAN): Promesa Falso, e documental local cu ta trata e topico di trafico humano y cu a wordo produci pa Paula Nahr di Switch Foundation cu e partnership di Kiwanis Young Professionals, Counter Trafficking Task Force, Departamento di Cultura y Nahr Media, lo wordo presenta den un Special Screening na e Forum on Migration di ST. Francis College na New York, dialuna 4 di maart pa 2 or di atardi na e Morney Theater.

Trafico sexual ta entre e

industrianan criminal cu ta crece rapidamente rond mundo y cu ta den proceso di bira un 'multi-billion-dollar enterprise'. Miyones di hende muher, hende homber y mucha rond mundo ta bira victima di trafico sexual cada aña y ta urgente pa tur pais cuminsa educan nan pueblo tocante e problematica aki.

E invitacion pa presenta e documental na ST. Francis College a yega na Paula door di un board-member di Amnesty International USA cu a haya e oportunidad di

wak'e y a keda no solamente impresiona, sino tambe impacta pa e informacion cu e video ta presenta y cu ta resalta e problema creciente di trafico humano y e impacto cu e tin rond mundo.

Despues di e presentacion di e documental Promesa Falso, lo tene un forum cu lo conta cu e presencia di e President di ST. Francis College, Dr. Miguel Martinez-Saenz y Dr. Reza Fakhari, board member di Amnesty International USA entre otro.

E topico di trafico humano ta taboo ainda na hopi caminda y e documental Promesa Falso ta habri e porta pa otronan tambe cuminsa cu e proceso di crea consenshi di e problema aki den nan respectivo comunidad, como tambe na nivel di educacion. Paula ta convenci cu e punto mas importante pa tackle ta informacion y educacion, especialmente pa e hubentud. Pakico? Pasobra nan ta bira victima facilmente door di nan inocencia, tambe, mirando e situacion real cu tur

pais di mundo ta enfrenta y cu ta e leynan pa trata cu pedofielnan. Tur hende sa cu e sistema ta faya e victimanan constantemente y esey ta e motivo principal pakico victimanan no ta papia y busca ayudo. E ora e mihor defensa ta e prevencion.

Paula a duna charla recientemente na St. Eustatius, fin di maart na Bonaire den un conferencia y e tin actualmente mas invitacion pa sigui presenta su documental na Alemania y na Los Angeles, y pa sigui duna charla na e hobennan. Den su discurso, Paula semper ta remarca cu esaki ta un producto di Aruba como un isla solidario y cu ta un contribucion na nivel di educacion, pa henter mundo, unda cu e documental ta wordo duna gratuitamente na tur fundacion y organizacion cu ta interesa.

Un invitacion ta bay na tur scol pa tuma contacto cu Switch Foundation pa nan por haya un copia di e documentario. Hopi hoben ta bayendo afo pa studia y nan



ta bay haya nan mes den un ambiente vulnerabel.

Paula Nahr ta hopi contento di ta hayando e interes pa usa e material aki como parti di e investigacion academico. Tambe door cu nos ta den un era digital, ta importante pa demonstra den exterior, den universidadnan y organizacionnan, cu Aruba ta conta cu e sosten di e comunidad. Pesey un invitacion pa sigui Switch Foundation pa medio di nan Youtube Channel, Facebook y Instagram.